



UNIVERSITÄTS-  
BIBLIOTHEK  
PADERBORN

# **Universitätsbibliothek Paderborn**

**Septem Illustrium Virorum Poemata**

**Amstelodami, 1672**

Ad Joannem Ciampolum, morbo recrudescente.

**urn:nbn:de:hbz:466:1-11215**

Medicea Heroüm soboles , cape læta triumphum :  
 Astris infereris , concilioque Jovis.  
 Ipse etiam nigrâ tinctum ferrugine Solem  
 Pallentes maculis jungere vident equos.  
 Quid triplex fidus Saturni , aut , Cynthia , vultus  
 Fabor scruposâ nocte latêre tuos ?  
 Hæc priscis ignota olim prudentia major  
 Repperit auspiciis artis , opisque novæ.  
 Ite citæ , & vestras meditando expromite vires ,  
 Ité animæ egregiæ , quæ via nulla patet.  
 At tu Musa procax , elegi tenuesque valete :  
 Non hæc sunt gracili facta canenda lyrâ.

A D  
 JOANNEM CIAMPOLUM,  
*morbo recrudescente.*

**E**Rgò hos assiduè gemitus in pectore volvam ?  
 Perpetuò lacrimæ nostra per ora fluent ?  
 Et roseo Phœbus me decedente videbit  
 Lumine mœrentem , me veniente die ?  
 Flebimus heu miseri ! luctus , solatia damni  
 Exigua ingentis , postulat ipse dolor.  
 Ille Philocteten docuit per Lemnia saxa  
 Vocibus horrisonis vulnera dira queri.  
 Halcyones Ceyca gemunt , & barbara regis  
 Daulias Odrysii crimina cantat avis.  
 Sic ego , sic mea damna querar crudelia semper  
 Lugubri citharâ , flebilibusque modis.  
 Atque utinam in gemitus nunc libera verba darentur !  
 Sed mihi posse queri fors inimica negat.

SIN-

Singultantem animam turgentes sanguine fauces  
Elidunt : voces aspera lingua premit.  
Jam quater ardentem sitienti Sirius astro  
Uffit humum ; toties frigore læsit hiems ;  
Nec venit ulla potens longo medicina dolori ,  
Nec mea Pæoniâ membra levantur ope.  
Ipse meum specto moriens miserabile funus ,  
Paulatimque animâ deficiente cado.  
Horrida languentes macies depascitur artus :  
Lutea pallescens inficit ora color.  
Cogimur & longam moriendo discere mortem ,  
Dum præsaga mali mens sibi fata canit.  
Felices , inopina dies quos funere mergit ,  
Occupat & celeri mors properata nece !  
Heu quoties morimur , dum proxima fata timemus !  
Hoc pejus leto : nam mora mortis obest.  
Haud aliter Lapithas , mœstumque Ixiona terret  
Jam jam lapsuro pondere prona silex.  
Credite, deficio : jam pellis dura resistit  
Tractanti, & tristi viscera tabe fluunt.  
Sic cera admotis tabescit Hymettia flammis :  
Sic tepidis Austris cocta pruina madet.  
Languent sic , urens oculus quos fascinat , agni :  
Sic tenera à Scythico læditur herba gelu.  
Nec tantùm doleo compressis faucibus æger ;  
Plurima quassato corpore damna fero.  
Ipsam animi sedem , regnantem corporis arcem ,  
Nunc caput ignavo possidet igne vapor :  
Nunc acres stomacho rabidâ cum bile tumultus  
Fervent , & sævo pondere discruciant.  
Lassum percurrunt ululantia murmura ventrem ,  
Humida nec membris dant alimenta dapes.

Vivo

Vivo equidem parcè , sed mox jejunia corpus

Attenuant : épulis abstinuisse grave est.

Intolerabilibusque malis comes addita cura ,

Mollem animum æternis pascitur ulceribus.

Hanc peperit morbus , morbusque augetur ab illâ :

Hæc me tristitiæ lurida felle rigat.

Hinc sæpè extimui graviora pericula veris,

Et sensi falsâ suspicione trahi.

Hinc animi victus damno quemcumque calorem,

Quodcumque & frigus pallida membra quatit.

Compositæ currant num vitæ ad munia venæ

Exploro , & trepidans incaluisse puto.

Seu quatiор tuſſi , fibras pulmonis anheli

Exesas carie suspicor esse truci.

Conveniunt crebrò nos , ut solentur , amici :

Spem vultu simulant , tristitiamque tegunt.

Ah genio indulge , curas depelle malignas ,

Clamant : tu morbo , Virgini amate , faves.

Ecquis erit finis lacrimis ? lugubria mitte :

Eia age linquantur mollia fulcra tori.

Te silvæ , te rura vocant : age , rura petamus ,

Quà diffusa nitet mitior aura poli.

Aucupio silvas , silvas venatibus aptas ,

Flumina , piscoſos aſpicioſeſque lacus.

Hinc canibus lepores , canibus ſectabere cervos ,

Latratuque feras retia ad alta premes.

Scilicet è ſtratis tollam miserabile corpus ?

Committam Alpinis ſqualida crura jugis ?

Fortia non riolstræ ſunt hæc ad munera vires :

Hi mihi ſunt colles , hi mea regna , tori.

Officium bona verba pium , ſed inutile tentant :

Definite, affiduis non saturor lacrimis.

Quid?

Quid? quod me cœli lædit spirabile lumen,  
Quo regimur: quævis mobilis aura nocet.  
Letiferi calidis spirant seu flatibus Austri,  
Sive agitata truci silva Aquilone fremit;  
Exerior proprias hiemes, pluviasque rigentes,  
Exundans cerebro quas pituita parit.  
Sibila perque aures imitata tonitrua surdas  
Volvuntur, miserum concutiuntque caput.  
Per madida ora liquor turgens me flumine largo  
Proluit: ampullis fervida sputa tument.  
Non secùs ardenti si fortè inclusus aheno  
Ebullit multo fervidus igne latex;  
Ipse furit, niveamque fremens eructat aquæ vim,  
Sparsaque anhelanti gurgite flamma madet.  
Miror, inexhausto tribuat quis pabula fonti;  
Qui tantus fluitet siccâ per ossa liquor.  
Mirantur medici, & sortem miserantur iniquam:  
Mille adhibent doctis pocula mista modis.  
Lacte arcere jubent inclusos faucibus ignes,  
Hordea dant, seris quæ maduere focis.  
Sanguine tentarunt salientem incidere linguam:  
Infecit tepidus brachia secta cruar.  
Poma coronato radiantia Punica crine,  
Languenti succos exhibuere suos.  
Et quo mala fluunt emuncta Cydonia muco,  
Quo passæ ficus, perlita sæpè gula est.  
Sæpè bibi, urentes meditans avertere flamas,  
Pocula pallenti cortice tincta nucis.  
Et modò silvarum foliis decussa Calabris  
Mella ministrarunt, helleborosque graves.  
Aggressique rosis sunt admiscere sapores,  
Quos mittit dives Trinacris Hybla favis.

Fascio-

Fasciolas tenues, ægrum focalia collum,

Et nidum pulsis gessit hirundinibus.

Quid referam quoties suffitu pectus odoro

Lustravi, & fumis, turifer Inde, tuis?

Et quoties, siccum possem ut distendere corpus,

Æstivi membris intepuere lacus?

Victum infelicem cochleæ, cancrique dedere,

Et testudineo squalida jura gelu.

Quin sunt conati stomachum fulcire ruentem

Arboribus gummi quod genit Arabia.

Balsama miscuerunt diti Gangetide merce,

Et quæ vicino cinnama sole rubent.

Sinarum extremo divulsa ab litore radix

Venerat, & nullâ me quoque juvit ope.

Aude animis, tibi certa salus promissa medentum,

Dicebant: numquam venit amica salus.

Obstitit auxiliis vivax in fomite labes

Artis, & irriguit vana magisteria.

Non hoc Phillyridis, non hoc laudata Melampi

Cura Amythaonii pelleret arte malum.

Tunderet in morbos Epidauria gramina frustra

Inclyta Phœbigenæ nos miserata manus.

Non gemitus Superi nostros audire perennes

Adjunctâ quamvis sustinuere prece.

Parce pium Numen, cæli quo templa reguntur,

Cujus & imperium sidera fulva timent.

Si non sacrilegæ mens est fibi conscia culpæ,

Redditus est templis si tibi semper honos;

Parce precor, vel saltum aliquam de fulmine partem

Deme meo: sœvâ projice tela manu.

Nunc & amara dies, & noctis tristior umbra est.

Quàm mallem æterno diriguisse gelu!

Ipsa

Ipsa quies rerum somnus , Deus utilis ægris ,  
Me fugit , & lacrimis lumina fessa patent.  
Versamur stratis , & nox est annua nobis :  
Tarda nimis querimur sidera Luciferi.  
Quod si conciliant depausta papavera somnum ,  
Me miserum hic quantis terret imaginibus !  
Occurrunt menti simulacra carentia vitâ ,  
Visaque sunt tenui dicere voce , veni.  
Ora virûm majora viris pallentia vultu  
Exangui illudunt , discutiturque sopor.  
Tunc iterum ad gemitus eadem nos horrida morbi  
Damna vocant , nec jam falsa timere jubent.  
Lenta tenent animum fastidia : nulla voluptas  
Fleſtit : non Bacchus , non juvat alma Ceres.  
Squalent impexi rigidâ cervice capilli :  
Vestis inornatos defluit ante sinu.  
Non Urbis , non ruris opes , aurique talenta ,  
Eoæque placent deliciæ lapidum.  
Ingratus mihi Sol , ingrata Aurora rubescit :  
Oblectant peccus tempora nulla meum.  
Aspice , jam Zephyri florens genitalibus auris  
Felices fetus parturit almus ager.  
Perstrepit omne nemus cantu , virgulta susurrant :  
Liquitur è summis tabida bruma jugis.  
In tepidos soles se roscida gramina credunt :  
Florea de vernâ pullulat arbor humo.  
Sed mihi nequicquam fulgent Nepheloidos Helles  
Sidera , ridentis gaudia summa poli.  
Semper hiems nobis : sanguis si vere tepenti  
Æstuat , infelix in sua damna furit.  
Acrius & morbo fauces tentantur acuto :  
Nam claudit servens arctius ora crux.

Ii

Non

Non raucae fontis scatebræ per saxa crientis  
 Murmura, non possunt prata movere animum.  
 Atque greges, atque arva nocent, atque ardua silva.  
 Non lati colles, pascua nulla juvant.  
 Et doleo, pingui pastos seu gramine vidi.  
 Mollibus in pratis luxuriare greges.  
 Sive quis ediderat pastoria sibila cannâ,  
 Odi signa bonæ sibila lætitia.  
 Et dulces avium per frondea tecta Camœnæ.  
 Heu visæ tantum sunt mea fata queri:  
 Seu viridi taurus projectus mugit herba,  
 Dixi: Mugitu me vocat ad gemitus.  
 Frumenta aspexi verno turgentia lacte;  
 Arens tunc subiit, quæ premat ossa, cutis.  
 Omnia læta, mihi sunt instrumenta doloris,  
 Materiamque mali mens sibi dura parit.  
 Et meditor: tellus non hæc mihi verna colores  
 Submittit; rident prata benigna aliis.  
 Vos legite ungue rosas, Tyrio queis fulgurat ostro,  
 Quæ flagrat niveis gratia mista genis.  
 Vos decet iste color, vobis sint lilia curæ:  
 Pratorum nitidum vos manet omne decus.  
 Ipse legam flores veterum monumenta dolorum,  
 Et ferrugineis te, Hyacinthe, comis.  
 Pallentes carpam violas, mœstaque cupressu,  
 Quæ laurum optarant, tempora vineta geram.  
 Impulerat nostras sonitus si gurgitis aures,  
 Purior electro fons ubi volvit aquas;  
 Conspiciens dixi: Non hæc mihi frigida currit  
 Sedatura gravem flumine lympha sitim.  
 Ora quidem sitiunt, quæ nunc incendia pascunt,  
 Non pandit latici sed gula pressa viam.

Oni-

O nimium, nimiumque fugacis dona juventæ !  
O quām veloci laberis acta pede !  
Tardiūs è Scythico cornu decussa sagitta ,  
Aëra per liquidum cuspide scindit iter.  
In nunc , ingentes laudato in corpore vires ,  
Atque lacertosos firma per ossa toros .  
Aut illas ætas annorum pondere frangit ;  
Morborum aut iictu fortia membra cadunt .  
Quique color malis Pæstana rosaria miscet ,  
Et quod nativum lilia vincit ebur ;  
Marcescunt subitò , ceu cùm labefacta caducum  
Sole gravi curvant alba ligustra caput .  
Olim qualis eram (nunc me mea fallit imago ,  
Si jam præteritos mente revollo dies )  
Cùm dives gregibus , memini , me Parma tenebat !  
Nam puerum celso nutriit illa lare .  
Quod mihi tunc robur , quām gaudia multa fuere !  
In fesso numquam corpore quanta salus !  
Non me terruerant hiemes , solesque potentes ,  
Et poteram pluvium vertice ferre Iovem .  
Quos ego non colles , quos non indagine cinxi  
Lucos , hortatus tescua per alta canes !  
Tunc celeres potui damas , tunc figere cervos :  
Vidi de flaviis humida lina trahi .  
Et modò fortis equi luctantia colla recurvans  
Confraga sectabar per juga montis apos .  
Interdum molles pedibus plausisse choreas  
Juverat : & digitis increpuisse lyram .  
Cura fuit Martis simulacra ciere sub armis ,  
Et pugilum ludis implicuisse manus .  
Gallica quid memorem quoties per flumina navi  
Adversa obnixo pectore stagna feco ?

Ii 2

Me

Me Tarrus, gelido lavit me Nicia fluctu:

Me Phaëthon tæo sustulit amne Padus,

Nec mihi solus amor corpus durare palæstræ,

Sed mentem egregiis artibus excolui.

Vidit Palladii nos impallescere chartis,

Inter laudatos nox vigilata libros.

Multaque Cecropiis trutinabar scripta magistris:

Non renuit mecum Græcia docta loqui.

Tentabam umbroſi latebras penetrare Lycei,

Quasque alii monstrant edidicisse vias.

Sæpè animum docti cuperunt scripta Platonis,

Cujus Mopsopio pagina melle fluit.

Et modò scrutabar Samii dictata silentis;

Nunc florem ex hortis legi, Epicure, tuis.

Insomnisque gravi sovit me Porticus umbrâ,

Arcesilaæus detinuitque labor.

Latratus decuit Cynicos audire legentem,

Nec me pacati terruit ira canis.

Democrito arrisi, novi præcepta Cleanthis,

Et Chrysippæ stamna mentis opus.

Gaudebam meditans, ineant quot prælia sectæ,

Graiorum in quas est didita turba senum.

Materiem hic componit aquis, hic aëre gignit;

Alter Apollinei sideris igne creat.

Ille Chao latuisse docet vaga semina rerum,

Omniaque arcanis necit amicitiis.

Æternum est aliis mundi versatile templum,

Machinaque hæc nullâ dissoluenda die.

At natum ille refert, ausus restinguere solem,

Et dare perpetuæ fata diurna faci.

Sunt quoque rore levi, & nebulis qui sidera pascant,

Et qui non uno se putet orbe tegi.

Caf-

Casibus hic sceptrum donat , Divosque relègat ,  
Exuit & mentes felligione Deūm.  
Spernit Tænarias , incendia postuma , pœnas  
    Impius hic ; trepidans manibus ille litat.  
Nec desunt sensus qui damnent , omnia fassi  
    Nesciri , tenebras seque latèrē suas.  
Omnia mirabar , sed tunc plus arte movebar  
    Socraticâ , & scriptis , Stoïca turba , tuis.  
Quæ bona sint animi , certus quis limes honesti ,  
    Quas sibi divitias vita beata petat :  
Et didici , sanctos formet quæ regula mores ;  
    Æstus quæ valeat vincere vis animi :  
Quæ tristes iras virtus , quæ frangat amores ,  
    Quæ desideriis peccatora anhela levet ;  
Pallentesque metus quæ fortibus induat armis ,  
    Ignavæ prohibens terga dedisse fugæ .  
Solum turpe malum sapiens putat , ille dolores  
    Perfert , consilii propositique tenax.  
Hic pede proculcans letalia fata superbo ,  
    Humanis major creditur esse malis.  
Ære Perillæo clausus fera jussa Tyrannî  
    Sperneret , & nullos ederet ore sonos.  
Hæc olim novi , quæ nunc me flagitat usus :  
    Utar præceptis , quæ mea fata petunt.  
Agmina mœrentum circumstant fæva dolorum :  
    Agreditur fessi vincere corda timor.  
Quid faciam ? unde petam trepidi solatia luctûs ?  
    Quis bellaturo fortia tela dabit ?  
Ite procul questus , animi oblectamina vilis ,  
    Ite procul : jam nos ingemuisse pudet.  
Non lacrimis durum novit mansuescere fatum ;  
    Parcarum inflexo fila adamante rigent.

Te supplex adeò, supplex tua munera posco,  
 O sola humanis mors medicina malis !  
 Tu portus, placido qui naufraga corpora mundi  
     Amplexu rursus non agitanda foves.  
 Adsis, horribilesque ferox huc flecte volatus ;  
     Hoc pete Tartareà falce cruenta caput.  
 Quo moriture ruis ? quæ te dementia cepit !  
     Parce miser verbis, ominibusque malis.  
 Scilicet in primâ florens carpere juventâ ?  
     Nec te spes famæ quantulacumque tenet ?  
 O ubi mens studiis quondam gavisa Minervæ,  
     Et quæ scribendi gloria dulcis erat ?  
 Non adeò usque mori miserum est : non segnior ibo,  
     Ibo animis contrâ : mors miserata veni.  
 Nec totus moriar, lethi custodia nostri  
     Te penès, Italæ, Ciampole, grande decus.  
 Carminibus celebrata tuis mea fama legetur,  
     Et ferar extinctus docta per ora virûm.  
 Auspice te mortis victor fata aspera rumpam ;  
     Te duce Avernali non cohibebor aquâ.  
 Quæ tibi cantanti non est permitta potestas ?  
     Nam tua Pindarico fulmine Musa tonat.  
 Tuscî scriptores tenerorum cedite amorum :  
     Gaudet capta novis Ausonis ora sonis.  
 Aldobrandinam relegis si carmine villam,  
     En tibi festa cohors plaudit Hamadryadum.  
 Sive Palæstinas Piceno in litore sedes  
     Concinis, Adriaci sternitur unda freti.  
 Et te Cælicolûm cantantem exercitus audit,  
     Quorum humeris templum dulce pependit onus.  
 Prô pudor Italæ, teneros quæ cantat amores,  
     Carminis & grato fraudat honore Deum !  
     Non

Non tulit ingenti laudandus Ciampolus auso :  
Illiū est nostris Musa operata sacris.  
Gaude : namque novis video tua tempora fertis  
Cingi , & Idumæâ fronde nitere comas.  
Tempus erit, læto tua cùm vestigia plausu  
Magnanimûm Vatum turba secuta colet.  
Tu modò perge alacer, semperque audentior ito ,  
Nec tu corvorum rostra inimica time.  
Nam super astra volans niveis veſtabere cycnis,  
Quà invidiæ telis gloria claudit iter.  
Nec minùs heroï tangit te cura cothurni ,  
Et potes Aöniâ dicere bella chely.  
Inclyta facta virtûm vocis si munere donas ,  
Munere tu signis das potiore frui.  
Hoc tibi Pegasides , hoc concessere Sorores ,  
Teque potestates edocuere suas.  
Namque ferunt celso Parnassi in vertice , sacra  
Bellerophontæus quà rigat arva liquor ,  
Seclusum florere nemus , quo gratius ullum  
Non surgit Phœbo , Piëridumque choris.  
Hos Zephyri campos Etesia flamina mulcent ,  
Arboribusque frequens roscida vernat humus.  
Pullulat ante omnes sed formosissima laurus ,  
Quæ medio in luco conspicienda viret.  
Una nemus truncō ingenti quæ parturit umbra ,  
Et latè foliis celat opaca diem.  
Hujus odorato sudantur balsama ligno ,  
Dulcis & ambrosiæ cortice manat odor.  
Indictum refero : lacrimatas nectaris undas  
Excipit Aöniæ sedula cura manus.  
Hos Musæ servant latices , queis perlita durat  
Gloria Tænario non violanda lacu.

Ma-

## 504 POEMATA VIRGINII CÆSARINI.

Materno nequicquam astu servatus Achilles  
Occidit, & Trojæ funera morte luit.  
At benè Pieriâ perfusus nectaris undâ  
Martis equis rapidum trans Acheronta volat.  
Copia felicis tibi, Ciampole, credita succi est:  
Fac mea cælestis proluat ora liquor.  
Ah socii fato miserere cadentis acerbo!  
Fer non casurum nomen ad astra meum.  
Tristia sic facili curabis funera sumptu:  
Non posco in cineres Persica dona meos.  
Non mihi Orontæâ tumulos aspergite myrrâ,  
Bustaque fecundæ mercibus Assyriæ.  
Si mea Caftalio stillabunt ossa liquore,  
Invida post mortis fata superstes ero.

F I N I S.

## Errata typographica.

*Pag. 185. lin. ult. leg. Extremis Nilli pag. 192. l. 11. leg. fano, pag. 194. l. 28. & 35.  
leg. Marcia pag. 212. l. 2. leg. Postera vix spercent; pag. 230. l. 5. leg. fratris superstitionis  
filium lin. 16. leg. per vestigia, pag. 268. lin. ult. leg. habet pag. 270. l. 9. leg. Max Te  
Pierio pag. 303. l. 18. de te Coadjutor Monasteriensis pag. 316. l. 26. leg. Plebi patet  
pag. 333. l. 1. leg. Flent pag. 371. l. 10. leg. Tethyi pag. 386. l. 16. leg. quam lin. 14. leg.  
Quo pag. 387. l. 2. leg. Aboliden lin. 6. leg. quantum lin. 27. leg. Suada pag. 388. l. 1.  
leg. arcet lin. 19. de te S. D. N. pag. 391. l. 28. leg. Nec illa pag. 472. l. 1. leg. nec illa  
pag. 496. l. 10. leg. gemit.*